

مالناش نصیب



مالناش نصيب: ديوان بالعامية المصرية
الكاتب: أيمن قطب
تصميم الغلاف: عبير محمد
إخراج فني: الباشا عبدالباسط
الطبعة الأولى: 2017
رقم الإيداع: 2017/27143
الترقيم الدولي: 4-03 - 6642 - 977 - 978

دار لوغاريتم للنشر والتوزيع والترجمة Facebook Page:

E_mail: Logarithmpublish@gmail.com

Tel.: 01015642559



المدير العام: إيناس ناصر
المدير التنفيذي: شادي أبوشهبة

جميع حقوق الطبع والنشر محفوظة ©

مالناش نصيب

شعر عامية

أمين قطب



إهداء

إلى كل عاشق لم يكن له نصيب مع

من أحب.

إلى كل مجتهد حال النصيب دون الوصول إلى

حلّمه.

إلى كل من فقد فرصة عمل أو سفر أو دراسة

بسبب النصيب.

إلى كل من تدخل النصيب في تأخر رزقه أو

نجاحه.

إلى كل من فرقتهم الحياه بأي شكل تحت مسمي

النصيب.

إلى كل من رحلوا عنا دون مقدمات بحجة

النصيب، وتركونا ننزف شوقاً ولهفة.

إلى كل ضحايا النصيب.

إليكم...



إهداء خاص جداً

إلى الشمس والقمر : أبي وأمي
إلى سندي وعزوتي في الدنيا: ياسر
وخالد

إلى أمي الثانية: وسام

إلى زوجتي

إلى أبنائي : يماني .. إياد .. يوسف .. ياسمين
.. أسر


إلى شوارع طنطا والرصيف وجذع شجرة
شارع البحر






فضضة

أنا نيجاتيف أوضح م الصورة
وكلام مُبهم مالهوش تفسير
أنا دوشة أحلام مكسورة
بتعافر تجري ف عكس السير
أنا زي الطير..
تلقاني برفرف بجناحي
مع إني أسير..
حبساه دنياه جوه سنيته
أنا أكثر واحد ناسينه
كما شفره ف درج الكوميدينو
مليانه رموز وحروف شخابيط
أنا دايمًا ساكن ضل الحيط






أنا واحد من كثر الطيبه
وصفوني الخلق بياني عبيط
أنا ١٠٠ مليون همّ وفكره
مسجون ورا باب من غير أكره
أنا داها خايف من بكره
وبحايل ف الأيام ترضي
وبخاف لو روعي ف يوم تصدا
من قبل ما تشبع أحلام
مرعوب للقطر يمر قوام
والعزم الي ف روعي يسييني
و ف وسط صراعي مع الأيام
الشعر الأبيض يغلبني
أنا مركب تايهه ف شط بعيد
مش لاقيه الي يمدلها الإيد





كما طفل بوش كاسيه تجاعيد
متعكز علي حبة تفاريح
بتحن الدنيا ساعات بيهم
وف لحظه تاخدهم أضعف ريح
أنا آخر ورقه ف شجرة توت
بتعافر ضد خريف الموت
عشمانه ف حزن ربيع تاني
أنا عارف إني أكيد فاني
قاطع تذكره .. والرحله ذهاب
نفسي أمللم روحي ف حضني
قبل اما الدنيا تاخدني غياب

* * *






إليها

من الشعر الي متسر سب .. ونازف نص ع الكفين
إلى الشعر الي مسترسل .. ونازل رقص ع الكتفين
ضاني الهجر يا ام الفجر
كما الضي ف شموع الليل
فكيف الوصل .. دليني
أميل لك ليه .. ولا تميلي
أين لك ليه .. ولا تليني
كفا بالله تذليني
دانا والله قلبي عليل


* * *





ملاك


ماهيش أجمل بنات حوا
ولا عيونها بنات الحور
ولا عودها غصون صفصاف
بيتمايل كماس مبدور
تشوفها الناس تقول .. عادي
وجايز حتي مش بادي
علي خدودها جنابين ورد
بتكره كدبة المكياج
وعايشه بدون خدع مونتاچ
ف كوكب تاني غير الأرض
لكن روحها..
خلقها الله أيات من نور





وبسمتها .. طبق بنور
تحلي الدنيا من نظره
كلامها كالدوا الموصوف
ضفاير شعرها المصفوف
عبير يسكر بدون خمرة
حنانها ف طبخة أمك
جفونها حزن بيضمك
وبيطمن بكل هدوء
تقولشي ملاك!
تقول للشمس لو غابت
عيوني تدّفي هذا الكون
بطله واحده م الشباك

* * *





* * *

ألوان للبيع .. ماسكات للبيع

ماسك يا هانم؟


تدهن معاليك؟

شكرا يا حبيبي .. ما عنديش وقت

والله يا باشا انا قلبي عليك

وشك من كتر الزيف ابهت

* * *





مالناش نصيب

يمين الله..

ما فيه مخلوق في هذا الكون

بأفراحه وأشجانه

بأشكاله وألوانه

بأشباحه وسكانه


بكل الموجودات جواه

يسيب بصره ف جدار قلبك

ولا يتهنى يوم قربك


سوى بس الفقير لله

على كفي بدأتي ف الهوا تحبي





وتتهجا خطاي الأرض
قطفتك غصن خام اخضر
ومتندي بميه ورد
وكان الوعد!
أكون لك أب .. تبقى أمي
أكون لك ابن .. ف تضي
علي روعي الي حنيتها بحروف إسمك
علي قلبي الي متحدد
إقامته بين ضلوع جسمك
بداية كل شئ أحلاه..
نهاية كل شئ ذكراه..
وانا رافض أكون ذكري
مفيش آخر مالوش أول
وانا أول مالوش آخر





لا ف امبارح ولا ف بكره

هتفضل سيرتي وياكي..

مطارداكي

كما ضلك نهار يوليو

مانا روميو...

أنا روميو الي غنالك غناوي العشق تحت البيت

معايا وجوه أحضاني

سباكي هوايا يا جوليت

أنا أول دموع فرحه


ترقصها عينيكي البكر

أنا الصوت الي بات ونسان..

يغازل فيكي حتي الفجر

وانا آخر كاسات السكر..

وأخر قاعده ع الكورنيش..





عشان بعديا تاني مفيش
صدا الضحكه اللي كات طفله

بترقص لما نتقابل..

ف غيبي..

مهما هتغيبي

أنا قابل

هشهد كل عود دابل..

من الورد اللي متشعبط

ف آخر سطر في كتابك


يقولك إني بتحدي..

بعشقي كل خطابك

وأصحابك وأحبابك

وكل اللي قصد بابك..

يقولوا ازاى يدوب الدمع فوق خدك





في غمضه عين!

يقولوا ازاي جناب فرح..

تطرح ورد ع الخدين

أنا وحدي معايا السر والتفسير..

وشفرة فك تكشيرك

وعقلك وقت تفكيرك..

صُباع روجك ومونيكيرك

وتوكه ف شعرك الحالك

إيه بس مغير أحوالك


ونساي الي كان بينا؟

يا تهر حنه..

(الورد كله كسا الجناب)


واشمعني إنتي الي شارده منا)

دانا أول فوارس قلبك الجامح كمهرة خيل






وأول بوسه من خدك
شفايفي يا عروسة النيل
وانا التنهيد في نص الليل..
علي غنوه بصوت سومه
لسه كفوفي مرسومه
علي أول فانوس رمضان
وأول شعر وروايه..
وأول يوم ف شتوايه
وأول عيد
هقول وهعيد
مفيش غيري ف يوم يقدر
يعوضلك ولو ثانيه...
ف حزن ضلوعي عيشتها
كثير هيچيكي طالب قرب






كثير هيدق باب بيتك
كثير هيقولوا .. (حببتك)
لكن أقسم برب الناس
ولا هتحتسي يوم إحساس
كما مني سمعتها..
أنا مانكرش إني قابلت
بنات أشكال علي ألوان
لكنك دون بنات حوا
خُلقت ملاك ف توب إنسان
مانيش غلطان..
مانيش غلطان إذا قولت ان مفتاحك
مالوش نسخه سوي عندي
ف عاندي
زي ما تعاندي






ولفي الكون علي كعوبك
منين ما تروحي .. مكتوبك
كأنك روح ومتفصل
يدوب توبها علي قدي
وياما الود كان ودي
أغمي الخلق عن صورتك
واعادي مين يجيب سيرتك
ولو بالخير
يا أجمل طير
أعاد أنفاسي بجناحه
يا أطيب من عطور فاحوا
كنسمة صيف ف عز الحر
يا آخر شهقه سايبه ضلوعي ومسافره
يا آخر أمنيات كافره





عرفتي ف الفضا تطيري
رفضتي تنزلي ع البر
ماكنشى ف بالي أتخيل
أشوفك وانتي ف الكوشه
وبصّاله بتبتسمي!
وف صباeck أشوف دبله
عليها إسم غير إسمي
أنا والله .. ما زعلان
ولا واخذ علي خاطري
مدام انتي الي قررتي
تسيبي كفوفي وتغيبي..
كدا بسهولة دون إنذار
سلام الله..

يا وشم حفرته فوق صدري





ومش هيسيني غير بالنار

سلام الله..


يا آخر حرف فوق سطري

خلاص مات الكلام بعدك

لمين بعدك..

هقووول أشعار!!

* * *






* * *

الهاتف الي طلبته
مشغول في هذا الوقت
لو كنت عندك دم
بطل تقول اشتقت

* * *






* * *

حلفت بأغظ الأيمان
لا عمري ف يوم احنلها
ولا ف البعد اغنيلها
ولا هتوضي من نيلها
ولا هتزورني ف الأحلام

واصوم تاني ثلاث تيام

* * *





شتا

خدعوك فقالوا..

إن الشتاء حُضنه دفا..

وان المطر بيعدِّي يغسل ف القلوب

كل الذنوب..

وان الي مكتوب فوق جبين صيفك .. خريفك .. والربيع

راح يختفي منه الأثر..

بفعل أحضان الجليد

وان الملامح الي أشعلها المشيب .. ترجع رضيع


وكأن ألوان السما..

لابسه فستانها الجديد

وان لما الروح تعافر


لاجل تهرب م الضلوع..

واما نبض الدمع يخلص






جوه أرواح الشموع
جاي ويا المطره عيد
خدعوك فقالوا..
لما الشتا بيزيد
تلقي كل المبهجات .. جاين تباعا ويا أول غيث
يا كل ليلى وكل قيس..
أنا عندي عُقدَه من الشتا
وموت ف جلدي إذا أتي
وكأن صوت الذكريات ع الشيش
بيذل ف وداني مع كل تنهيده مطر
نوح العواصف ف الشجر..
بيغني غنوه حزينه علي ضي النيات
كل اللي مات..
يبعث مع أول فلاش للبرق
فتنور العتمه اللي سكنت ف البيوت






ف تدوب خيوط العنكبوت
وتبان ملامح ضيها..
عريانه م المكياج
عيد تاني نفس الفيلم
إعرض بدون مونتاج
إفرك عينيها النعسانين .. ع الرف
إكشف صورها المرسومين .. ع الكف
شبطانه ف ضلوعي .. من قساوة البرد
همس الحنين ليها..
أشبه بصوت الرعد
إضرب فلاشك..
صحّي كل الي اتنسي
من هنا ورايح..
مافيش لعل ولا عسي..
قرب هنا عندي





وادخل كمان بالزووم..
زيح الستار بشويش
عن وشها المرسوم..
فوق كل تفصييلة وجع
من حنايا الروح
فتح جروح .. بتئن بس ف مطرحها
من كام شتا عدّي..
في مثل هذا الوقت
سابت علي بابي
دبلة خطوبه وكارت
دعوة حضور لفرحها

* * *






* * *

مّبي اللى باقى من سنين العمر
وكفنينى باللى فاض منهم
نخل الولاد ما ف يوم هيطرح قمر
طول م النهايه ف مشرحة زينهم


* * *






أنا حرة

مش يعني عشان سني بيكبر
وخلص قربت علي التلاتين
أتنازل واتجوز جردل
لمجرد إنه معاه قرشين!
سوق الجوارى جبر
وانا حره .. مش بايره
مش عاوزه ١٠٠ شبكه
لو خانقه ك الدايره
ملمسها لوي دراع
وانا روعي ما تتباع
بمهر وغويشه..
ملعونه دي العيشه..






لو المشاعر fake
أغضب علي قلبي
يديك حنان مش ليك
يعزفلك المزازيك
وانا م اللي فيا بموت!
مش طالبه تاني سكوت
هصرخ بعلو الصوت
يا ابويا يا أمي
قلبي ماهوش للبيع
ف ماتحملوش همي
لو ١٠٠٠ عمر يضيع
ماهو مش عشان الناس
أخسر كمان روجي
وأعيش بلا احساس





واكتم دموع نوحى
قالوا اللقا دا نصيب
ونصيبى يوم هلقاه
ولا عمرى يوم ارضى
غير باللى انا ريداه

* * *





* * *

ياللي فاكرين الغياب
كسر قلوبنا وهدّنا..
القرب منكم كان عذاب
نبتّ دموع علي خدنا
من يوم ما طيفكم عنا غاب
ليلاقي .. نحمد ربنا

* * *






* * *

أنا مش ملاك..
ولا عمري كنت ف يوم ولي
ولا هبقي يوم..
ف التضحية سيدنا علي
رمانى سهم عينك دوا
صار قلبي أنا .. فارس جسور
تخشاه جميع الأفئدة
تلمح حراب كل العدا
نظرة عيونه ف تنتني
حُبك سباني بضحكتك
سلمت جيشي ف حضرتك
الرحمة ياللي فتنتني

* * *






* * *

ما تصدقوش الحب في البدايات
كل اللي عشقوا .. ماتوا في ثواني
الحب فيلم جميل في أحداثه
لكن نهايته .. براءة الجاني


* * *






ما حبتنیش

ما حبتنیش..
وم الواضح کمان جدًّا
بان القصة کات إعجاب
مراهقة بنت مبهوره..
بقصص سیما وسراب کذاب
مجرد طفله مشدوده..
لصورة حد سابها وغاب
کما تلميذه بتغازل..
عیونها قلب ۱۰۰ أستاذ
رموشها المسحورین إعجاز
یا ویله مین تناديله






تغمي نهاره عن ليله
يطوف أرضه بقناديله
وعهد الله كما الدرويش
بكل سذاجه حبيتها
لكن هي..
ماحبتنيش
ولو حلفت..
بان هواها كان صادق
وان الغدر كان مني
قولولها للمسا غني..
عشان الحب مش كلمه
ولا كدبه ف كلام غنوه
ولا قعده علي الكورنيش
قولولها الحب زي الشمس





يدفي الكون دا من نظره
برائته في طيبة العدرا
قولولها الحب ملح وعيش
وليه تقولوا وليه تعيدوا
ما دام أصلا..
ماحبتنيش
يجوز شدتها تركيبتي
يجوز شكلي ودفا صوتي
يجوز لابيض علي شيبتي
يجوز الهييه ف سكوتي
لا انا عارف ولا قادر
أحدد سر إعجابها
لكن واثق تمام جدّا
بأن هواها فترة طيش





ف بالمنطق وبالمعقول

تكون طبعا

ماحبتيش

يجوز لمحت..

ملامح أب في عيوني

يجوز قابلت صحاب فيا

يجوز كات صادقة النيه

وحابه ف يوم ما تخسري

ويمكن كات بتتسلي


رهان علي غدوه في الشله

لأول واحده تكسري

وفازت بالرهان هي

وعملت قلبي لعبتها


وملت منها ف رميتها





كأني كنت تسليه
ومن يومها لا انا عايش
ولا مع غيرها قادر اعيش
يا ريت لو حد يعرفها
يقولها ليه..
ماحبتنيش!

* * *






* * *

كفارة بُعدك عن عيني
وغيابك من غير أسباب
أشبع من حضنك ١٠٠ ليلة
وان زدتي .. أهو كله ثواب

* * *






* * *

وبعمل ناسي..
برغم اني ما عمري نسيت
وبعمل قاسي..
لتفضحني حيطان البيت
وتفتن ليكي عن حالي
وتحلف ليكي بالغالي
ياذك ساكنه ف النني
لكني بداري اكمني
عزيز النفس لو حنيت
ف بعمل ناسي..
برغم ايني ما عمري نسيت

* * *





وهم

لمحتك صدفة..

لا اتهزيت

ولا دب الحنين فيا

كأنك ذكري منسيه..

ومطويه ف رساله بحر

كأنك سحر..


وراح مفعوله من بدري

كأنك وشم..

بهت تصويره من صدري

كأنك..

لوحه مرسومه علي موجة شتا هايح





مالوش برواز..

بترميها الشطوط ع البحر

وتحدفها البحور ع الشط..

فتتسرب فتات ورزاز

كأنك شمس كات دافيه

وغاصت جوه جوف الليل

كأنك قاعده كات ع النيل..

ودابت وسط فيضانه

سجنت القلب ف عيونك


وكان الوهم قضبانه..

وعشت الدور ب إنك كنتي نداهه..

ولابدالي ف وسط الغيظ

بان عينيكي دول عفاريت..


وانا المعتوه





ولو شوفتك .. أخاف علي قلبي من جنك
واقول حابس .. بلاش تؤذوه
لقيتك ذكري من ماضي .. عديم اللون
مليتك وهم علي الفاضي .. كما البالون
رسمتك ف الهوا ليلى .. وبقيت مجنون
أنا ممنون..

عشان بعدك سنين عني
أزاح الغُمه عن عيني
وعراي قزاز شفاف
يدوب من لمسه يتكسر
قضيت العمر كله عجاف
بدوق المر كالسكر
يدوب من طله ف عيونك..
بتوه واسكر





ولا أتأخر..

ولو بالرمش شاورولي..

غزلتك عُقد من لولي .. وعلقته ف جدار قلبي

كثير العشق بيخبي..

حقايق زي ضي الشمس

كثير الوهم صورلي..

هواي زي فرض الخمس

حضنت إيديكي كالأعمي

مغمي القلب عن عيبك


أمنتك تحرسي غنمي

عملتيهم عشا لدييك

خلاص سيبك..

قالولي الكذب دا خيبه..


وانا راح اكون معاكي صريح





طول الهجر والغيبه..
بنالك جوا روحي ضريح
بقيتي ف نظري مش حيه
عرفتي ازاي .. لانا اتهزيت
ولا دب الحنين فيا؟

* * *






* * *

وكالعاده..

تقرب مني ناس ياما
تعشم قلبي بالفرحه
أفكرهم بطيبتي .. يمام
ف بلقاهم نسور جارحه

* * *






* * *

ملم ضافيرك يا قمر
شعرك طرف رمشي
من يوم ما طيفهم مسني
وانا والله ما بنمشي


* * *





آسف


بحس معاكي ليه دائماً
ب إني شيطان .. ومداري ورا الأكاذيب!
بشوف صورتك كما الحملان
وابص ف عينك ألقى الديب
واتوووه وأغيب..
واعود اتوضي ف عنيكي
كما الملهوف علي التوبه
وبرجع تاني أحلفلك..
وأقول سامحيني دي النوبه
كأن دموعك الطاهره..
بتغسلني بمية ورد
وكفك لما يتمايل..





علي شعري بينزل برد
وبين جفناك أطوف واسعي
وادوب ف احضانك الواسعه
مانيش معصوم..
ولا عابد..
ولا زاهد..
وساكن غار
أنا نادم وكلي مرار
وبترجاي .. سامحيني
رماني الشوق قصاد بابك
بلاش بالله ... تصديني

* * *






* * *

صباحکم ورد..
متندي بخمور عینها
صباحکم جنه..
محفوظه بغناویها
صباحکم زیها طیب و متحني بخطاویها

* * *






* * *

واتحالف مع قلبي عليها
واحلف ما هسامح ١٠٠ حلفان
ومجرد ما تطل عينيها
أرجع في كلامي واقول .. غلطان

* * *





صباح

-ألو...-

إزيك يا امه وحشتيني

-طمني عليك .. أنا زي الفل يا نور عيني

-مال نبره صوتك مش رايقه

حاسك مهمومه و متضايقه

شكلك تعبانه ف عزق الأرض

-ما تخافش عليا انا زي القرد .. دول حبة برد

-أنا سامع صوت تسجيل عالي

نادي حد من اخواتي يوطيه


-طمني عليك انت يا غالي

أحوالك إيه؟





-ما توطي يا أمي الوش مانيش سامع
-الصوت دا يا ولدي ماهوش في البيت
دا كمان فيه صوت طبل وزغريط!
دي عروسه وزفه في حتنا..
كات في الكوافير
-يا ما شاء الله..
والله يا أمي دي بشرة خير
بس استيني .. عروسة ازاي!!
وشارعنا مافهش صبايا ملاح
ما في حد حدانا في سن جواز
غير بس يدوب البت صباح!
-من فاتك فوته يا نور عيني
وانساه ترتاح..
-ليه ياما كلامك ويايا ماليان أَلغاز





-دول صنف يا ولدي ما يستاهل .. غير حرق بجاز

-فين يا امه صباح!!

روحي ناديها

وقوليلها ان انا حوشت المهر

ويدوبك نازل آخر الشهر

دانا حتي جايب لها شنطة لبس لوحديها

وغلاوتي ف قلبك يامه..

روحي ناديها

-إرحمني يا ولدي أبوس ايدك..


أنا عندي الضغط

-والله يا أمي ما هتكلم

من تاني بشرط

أسمع صوتها لأخر نوبه

هرتاح لو قالت مغصوبه





-بكفايه يا ولدي تقطع فيا .. الله يسامحك

-طب طلي يا أمي من الشباك .. قاعده بتضحك؟

-أيوه بتضحك..

وعريسه شايها وطاير طير..

لساك هتغير!!

صدقني يا ولدي

ماحدش عارف فين الخير

وغلاوتك بكره راح اخطبك ست أبوها

-أحلفك علي مصحف يا امه..


أكيد غصبوها

دانا واشم حرف الصاد جلد ف جسمي

قولي يالا كمان:


انها باعتت دعوه ب إسمي

طب حالا تروحيلها تباركي..






وتديها نقوط
وتخلي شاويش المسرح..
يصرخ بالصوت
ويقول النقطة دي ع الخاين
والله يا أمي ما كان باين
إنها تغدر وتخون العهد
هو انتي يا أمي بتحكي بجد!
كات دايمًا تبكي وشيفاني رايح ع الجيش
لو ملحت عيني بتداري وبترد الشيش
دي ماكتش تقول..
غير بس يا عمري ويا نصيبي
تؤمنني بالله ان صورتها ما فارقت جيبي
قومي شيلي ريحتها هناك من دولايبي
هتلاقي عروسه وكام صوره





وشريط لحليم..
وقزازه ريحه وكام بيت شعر
ف جرح قديم..
علي كام ورده
إديهم لبتاع الخرده
وبيعيله ماضيها بسعر رخيص
عندك هتلاقي جواب ف قميص
مليان بكلام حب وأحاسيس
بس اسمه كلام..
وشوفيه كدا ياخذ قلبي الخام!
-فوق يابني لروحك
واتنصح كفيك أوهام
-من يومي الهم صديق ليا ودايما موعود
-من ريحة صوتك مش حاسه انك ناوي تعود





عاود علشان حتي اخواتك

واياك تندم علي من فاتك

-مش راجع يا امه..

مش راجع يامه الا وإبنك مرفوع الراس

هتدور الساقيه وهسقيها من نفس الكاس

ومادام عايشين غربه ف غربه

وأخرنا هنتكفن في تابوت

مش فارقه خلاص شكل التربه

كده كده .. ف الآخر هنموت

* * *





هيشم

(إلى روح المرحوم هيشم زقزوق)

ومنين أجيب م الدمع

قد المرار والوجع

والله يا هيشم..

ما عاشرت زيك جدع

كل الكلام عاجز

كل البكا جايز


كل الحضور غايب

وانت اللي بس حضور

مش هقدر أوصف أم

علي فرقتك .. في سطور

أنا بس بعتب عليك






ودا من حلاوة الروح

علقتنا ليه بيك

لما انت ناوي تروح!

* * *






* * *

وعشقت غيرها من النساء
البيضا والسمره وام البشره خمريه
لفيت بلاد الله عساني ألقاها
لقيتها كل البنات
كل البنات ... هي

* * *






* * *

جربت في مرة يذلك قلب
لمجرد إنك حبيته!
زي اما في مره يعضك كلب
بعد اما تعبت في تربيته!

* * *





ماتلزمنيش

ماتلزمنيش..

وم الليله دي ناوي أعيش

لأول مره من غيرك..

من الليله .. لا انا طيرك

ولا حضنك دفا عشي

ف شيلي م الصور وشي


وسيبي ضحككتك صوره

تشوفها الناس تقول عايشه

لكن من جوه مكسوره


راح اتعود علي بُعدك...

هاكون أحسن أكيد بُعدك






ولو قولتي في يوم راجعه
صدي صوتك يكون الرد
ماشوفتش مره منك سبت
منين عاوزه تشوفي الحد!
وليه أوقات ما بنقرب
بتبني ألف سد وسد؟
ماعتش باقي في رصيدك
ثواني حلوه تشفعلك
تحنن قلبي من تاني
وحضني الي زمان دوقتيه
حنانه ماعتش هايسعلك
ولا عمره هاينصاعلك
ولا هيرق لأغاني
وكل قصيده كات ليكي





ماكنش عينيكي ملهمتي
ماكنش القصد فيها انتي
أنا كان قصدي واحده تكون
ف طيبة امي ودفا بنتي
وكفي الي عليه نمتي
سند شالك ف وقت الجد
وكان شالك في ليل البرد
ماها تقابلي في يوم وشه
خلاص غيرك سكن عشه
بنيتي في الفضا قصورك
وبعتيني وانا شاري
خلاص دلوقت جه دورك
عشان قلبي ياخذ تاري
أنا القلب الي صلي وصام .. في محرابك





بنيت لك من ضلوعي مقام .. علي بابك

وطوفناكي كما كعبه

وسبحنا ف عينيك السود

أتاري القصة كات لعبه

لعبتها بكل برود..


من الليله مانيش درويش

وواحد من مردينك

من الليله .. ماتلزمينيش

ولا قلبي .. علي دينك

* * *






* * *

30 يوم بدعي وانا صايم
"إلهمني يارب انسي غيابها"
وعشان ولا دعوه كانت صادقه
صليت العيد قدام بابها

* * *





* * *

كل اللي قال لك..

عمري م اضلك

كل اللي عاهدك..


هنفضل ف ضلك

كل اللي وعدك إنه فاضلك

كل اللي وهمك يوم باهتمامه

وقت العوزه .. هتعرف تمامه

* * *






* * *


طعم الامكان علقم
من غير وجودك فيه
و ف كل يوم يسأل
يا هل تري .. نسيتيه؟

* * *





يا مدمنين السهر
بدموعكوا وش الفجر
مين اللي قال البكا
موصوف دوا للهجر!
مين اللي قال الدموع
بتغير المكتوب...؟؟
لو كان ف باله رجوع
كان شد يوم مكتوب
يا سهرانين الليل
قدر نموت م القهر
ف نشكي للمرايات






مكتوب علينا الصبر
ف نداري في الحكايات
عمر اللي راح ما هو جي
ولا له نصيب فينا
قالوا مسير الحي..
أنا قولت مش لينا
يا مدمنين السهر
لو كات دموعكم مطر
ما هتروي يوم قلبه
الذنب مش ذنبه
ف بلاش تعيش ف الدور
لو كان صحيح حبك
ما يسيبش روحك بور
من يوم غيابه والسنين



مصلوبة علي باباك
مشتاق لمين سابك؟
طب خلي عندك دم
دا عمره يوم ما اهتم
يسأل علي روحك
وفر بقا نوحك
بكفايه كذب ووهم
من يوم بعباده وقلبك
نازل نزييف بلا سهم
حتي قسايد وحدتك
ما ليها وزن أو قافيه
ماليتها الحزن بالعافية
لا ليها معني أو صوره
غناوي شطورها مكسورة





ذكري الشوارع والسكك

تايهه ملامح شكلها

من كتر لهفة لانتظار

كل الكراسي والدكك

تدعى لمطلع فجرها

حضنه يعودلك تاني دار

مرت سنين .. ولا مره عاد

فاض الحنين رغم البعاد

أدمنت ناس مش مننا


أكثر من النيكوتين

كل اللي قال هفضل هنا

طالت غيبتهم بالسنين


كل اللي وعدوك بالهنا

كان ردهم ببساطه (seen)






علي ١٠٠ رساله ف درجهم
إتعلم البيع منهم
واعشق ولو حتي القمر
أهو تبقي ضامن طلته
واياك وإدمان البشر
ما لاقوش دوا من ذلته
وفر عتابك للصور
من إمتي كان ف الصورة روح
وفر نحيبك في السكات
بطل تحن لذكريات
وترش ملح علي الجروح
لملم ف روحك يا جدع
خليك بقا قد الوجع
علم الاحزان تنوح





يا مدمنين السهر
بالدمع فوق الخد
من إمتي كان البكا
ممکن يرجع حد!

* * *






* * *

عليم الله
ما بتعدي عليا صلاه..
بدون ما ادعي واقوله يا رب
لا انا لاقى سبيل للقرب..
ولا قادر ف يوم انساه
عليم الله

* * *






* * *

ضفرت م الشعر شالك
ورسمت بالوشم عودك
ع الشوك وقلبي مشالك
إمتي هتوفي بوعودك!


* * *






حلم

لا عمري يوم دوقت السهر
ولا قلبي ناجا ف يوم قمر
عودت روعي تكون حجر
مع كل أصناف النساء..
مش لاقى قلب يشدني
ولا لاقى حزن يضمني
ويصحي فيا اللي اتنسي
مركب ودابير ع الشطوط
ولاعمره زار شط ورسى
كات كل واحده تشوفها عيني
تلميذه لسه ف مدرسه
وانا نفسي واحده تكونلي بيت






تكونلي غيظ..
وسط أيامي العجاف
تمسح الماضي الرصاص
ترسم الأحلام بجاف
أغزل قصايدي ف وصفها .. تطلع غنا
أسرح بعيني ف حسنها.. أشبع سنه
يعني تبقي ف غربه عيله..
أرمي همي وألف شيله..
علي كتفها لو يوم تعبت
وان عنها غبت..
تبقي سكاني ف عز ليالي
تبقي واحتي وسلسبيلي
يعني م الآخر تكون
من حكاوي ألف ليله
كنت برسمها ف خيالي





زي إبره ف بحر قش
وانا الصراحه لا حمل وش
ولا حتي عوم في شبر ميه
موت الغرام مالهوش ديه
ولا له دوا..
وانا أصلي خايف م الهوا
وعمري ما اديت الأمان..
وادي اللي كان..
كنت راكب ميكروباص..
سرحان كعادتي ف المرابه
بصوت رقيق .. طلقة رصاص
إبتدت كل الحكايه..
"لو سمحت الأجرة كام ..؟؟"
بصيت لها نسيت الكلام
وكأن غيه من الحمام





عششت علي باب شفائفي...

رفضت تطير

كل اللي فاكره وقتها..

وروحي دايبه ف عطرها

نسمة هوا كيف الحرير

كان نفسي أبوسها ف خدها

وافتح بيان المنتهي وارقص واطير..

غمضت عيني وسييت للأحلام خيالي

معقوله دي اللي مكتوبالي..

وعاهدت نفسي أكون لها


من هنا ورايح حبيب

شمس الهوي عن عشقنا

لا تنظفي .. ولا يوم تغيب

وف عز م الأحلام بت رسم

إنها قدرتي ونصيبي





تليفونها رن ورنته هزت كياني..

وسمعت صوت بيقولها

- (فينك حبيبي؟)-

كل الكلام جه وقتها وتاه من لساني...

كان صوتها بيدب ف ورديدي ميت وجع

بصيت ف إيدها ملحت حرفين من دهب

مش قلتلك .. إبعد يا قلبي لتتوجع!


بتحن ليه..

وبتتهمنى اني السبب!

خلاص ارتحت!!

"علي جنب يا اسطي لو سمحت"

* * *






* * *

ولو مرضي هيبقي دليل
بانك ساكنه في النبي
لاعيش العمر كله عليل
عساكي تجيني وتحني

* * *






* * *

غزلت ليها القصايد
عساها تقراها
عشقوني ١٠٠ واحده
يا خساره ... إلهاء!


* * *





تجعيدة


مع أول تجعيده ف وشي
بتكرمش حته ف تفاصيلي
وتزريح في ستار آخر أيام
من آخر مشهد ثلاثيني
وبتعلن توقيت البدء..
عن أول لحظات الصدق
من بعد سنين في سراب كداب
لملمت اقلامي وكشاكيلي
والحبر الي ف عمري باقيلي
وبدأت أدون كشف حساب





جمعت الحاضر ع الغايب
وطرحت الماسك م السايب
والناتج : إني ماليش نايب
ويا الأحباب..

* * *






* * *

سنين العمر عماله
تغمي عينينا ع الفرحة
وكثر الهمّ خلانا
ما فارق بكره م البارحه

* * *





* * *

مش قولتلك..

مسيرنا ف يوم هنتفارق


ساعتها مسكتي في إيديا

وقولتي فراقنا هو الموت

غريبه..

مش سامعلك صوت!!

* * *






* * *

بشوف طيفك علي المانيكان
بيضحك لي بطرف العين
ف امد الإيد واقرب له
وافوق علي خطه في الفتارين

* * *





حبيها

-بتحبها؟

-بحبها!

يا بني الكلام لو مهما طال

ولا الخيال لو صال وجال

ما هيووني حرف ف حقها

سبحانه أبداع وصفها

ورد وعبير علي خدها

تقدر تقول:


دى حوريه جايه من الفضا

غير البشر

طلة عيون

أشبه كدا بضي القمر

صوتها بلابل





ضحكة ربيع بتغني غنوه ع الشجر

شهد النهود وصفة دوا

كل الفصول تطرح سوا

لو بس توكه ف شعرها

..اتبسمت

كل النايات تعزف فرح

لو صابها مس بسحرها أو سلمت

طب اكلمك عن حسنها!

عن قلبها!

عن طفله بعشق عقلها!


عن متعه النظره ف ملامح وشها!

عن سحبه الكحل اللي بايس رمشها!

بقا كل دا .. واكثر كمان

وجاي تقول .. بتحبها!!

* * *





* * *

تجوز الرحمه ع الي عينيكي

دون الخلق تختاره..

يهيم وسط البلاد درويش


بمسبحته وتيا به الخيش

عزيز .. فارد جناحه الريش

عشق .. ف اتقل مقداره

يا ريت طيفك ما يوم زاره

* * *






* * *

لو كنت ف صوره مع صحابك
سيب دائماً بينكم مسافات
جائز تحتاج تفصل صورتك
لو جالك يوم وما بينكم مات


* * *






عاوز تنساها؟

لو عاوز تنساها بجد..
أو نفسك طيفها ف يوم ينسك
إقفل علي رمشك باب نوحك
روح شيل الوشم اللي ف روحك
واطرد أشباحها من الشباك..
بطل تتألم ... ل صورتها
بطل تتكلم ... ف سيرتها
وان جالك يوم دمع وغلبك
إبكي بدون صوت...
علشان وردتها اللي ف قلبك
ما تلاقي ف يوم شربة ميه





تدبل ... ف تموت
الدنيا يا صاحبي ف مجملها
كميزان مقلوب
مش عيب تتنازل لو مره
وتبات مغلوب
أوقات نتساب
وساعات بنسيب
وأهو كله نصيب..
هي دي أول بنت تشوفها!
ولا دي أول ملسة ايد..
ولا دا أول حزن تفضفض علي كتفه لو الهم يزيد!
ولا علشان يمكن يعني
نسيك .. ومفيش بينكم مواعيد
وسنينك فاتت هجر وصد





لو عاوز تنساها بجد

ليه روحك ساكنه ف تليفونك

مستني تشوف منها رساله!

وان مره لمحت انها active

تفضل متلخبط متكتف..

حالتك حاله

وتقضي الليل تغزل ف كلام

ترسم ف وشوش وقلوب وأهات

وساعات بتجر وراها ساعات


وتفوق علي حبرك متبخر

والدمع معاند .. متحجر

رافض ينزل..

كرباج ع الخد

لو عاوز تنساها بجد





بتواعد ليه داها طيفها؟

وبتاخذك خطاويك نحيثها

أنا عارف ان انت تملي

عائش مسجون جوه ريحتها

محفوره ف روحك تفاصيلها

مرسومه ف كفك صوابعها

بكره الأيام قادره تنسي

إسمع بنصيحتي وخذ مني

ماتشورش طيب .. روح لمجرب


وانا ياما عانيت م اللي حصلي

نفذت نصايح بالميللي

جايز تبعد عني

عساها


ودفنت ف روحي كلام وحنين





زي السكران جوه متاهه
وبقالي سنين وسنين وسنين
لا انا عارف اعيش..
ولا بنساها..

* * *






* * *

في هواي يا ليلى بقيت مجنون
ونقشتك ع الروح حدوته
سبحان من لم بنات الكون
وخلقهم بس ف بنوته

* * *





يا عيني

يا عيني عليك..

يا ابو القلب اللي متعبي جبال من همّ

فضلت تخاف كثير منهم

ل يوم يبيعوك

طلعلك ديب

ومتداري ف غيطان خوفك


في يوم ما سابوك

ما ياما قولتلك يا بني

وماسمعتش كلام لأبوك

بنات حوا كما الحيه


وقلبك جوز حمام أخضر





فتحتلهم باب الغيه..
وكان غيرك كثير أخطر
جرى دمك كما الأنهار
لا ليك مرسي ولا قارب
فتحت الباب ليه ع الغارب!
لا منك سيبته متوارب
ولا عارف تعود للبر
نصحتك..
وانت برضه الحر

* * *






ذكرى

ملمت كل الذكريات..
وبواقى قلبي الي انكسر
علي أهه من صوت النيات
وليالي من عمري الي فات
علي كام حجر..
من كل سكه روحنا فيها
وكل صوره روحنا فيها
وطويت بلاد الله..
يمكن ف يوم ألقاه
وافكره بيها..

* * *






* * *

أکید ف القرب متھني
وعجباک الحياہ البمبي
مسیرھا قمص دمک مص
وهتشرّف هنا جنبي

* * *






* * *

لا هي آخر بنات حوا
ولا طوق النجاه ف إيدها

إنت الی عبیط وحبیتها

* * *





نفسى اكرهك

نفسى اكرهك..

واوئد بايدي كل ثانيه ف قربنا

واسجد فرح علي بعدنا

وامسح ملامح بصمتك..

من كل تفصيله وجع

وارمي الي فاضل ليكي عندي

وادفن هوانا المرتجع


وارحل مفارق مطرحك

نفسى اجرحك..

واشوف دموعك شمس تنزف في الغروب

نفسى الملحك..

هيمنانه تايهه في الدروب





جايز تحسي باللي قايد جوا مني

بطلت أغني..

بطلت أغزلك قصايد

قلبي اللي كان كالطير برئ

رماه غباه جوا المصايد

كان نفسي ابيع .. لما تبيعي


بس المصيبه..

إني لا قادر أفوق لنفسي

ولا حتي عارف..

أعيش طبعي

* * *






* * *

إنتي الي قررتي
نعيش بعاد عن بعض
وبقالنا اهو ف البعد
3سنين رسمي
لما انتي كرهاني
سميتي ليه إبنك
أيمن .. علي إسمي!

* * *






* * *

مع إنك متأكدہ جدًّا
إنه البایع .. وانك مش لیه
لیه كل أدان لما بیدن
تبكي عینيكي وبتحني إلیه!

* * *





وليكن

وليكن..

هعتر كل الي بينا

لم يكن

بس الشوارع الي ساكنه ف ضمتك

حالفه اليمين

م الجأ لغير حضنك سكن


وليكن..

هعتر كل الي بينا

زي مشهد جوه فيلم

أو مجرد طيف ف حلم


مر خطف ف ربع ثانيه





هعتبر إني ما شوفتك
أو حتي إنك واحده تانيه
بس ليه رغم الغياب
لسه كحلك خال ف خدي!
كل ليله ف بعدي عنك
عقلي من كتر الصداع
أيام يجيب وسنين يوذي
لسه ليكي ود عندي
لو باقيلي ود عندك
أستحلفك .. بالله تردي

* * *






* * *

من وقت غيابك عن عيني
والريق أهو ناشف علي بيرك
رقصتي القلب علي السلم
لا هو قادر ينسي ويستسلم
ولا عارف يعشق يوم غيرك

كتر خيرك

* * *






* * *

يخاف لو بص ف صورها
يصحّي ذكريات فاتت
فيعمل روحه مش شايف
ويوهمها انها ماتت

* * *






* * *

جربت ف يوم إني انساكي..
يمكن ف البعد ألقى الراحه
و ف أول يوم زارني .. طبيبي
قال : روحك محتاجه جراحه


* * *





مشهد متعادر

في تمام الساعه ٢ بليل
والفجر بيترك ف عيونه
ويلم بواقى نجوم الليل
علشان يستقبل ضي جديد
من كدر بعيد..
بتلف الكاميرا بزايه ميل
علي بوابه معهد للكبد..
وانا واقف جوه البلكونه
برسم بسيجارتى قلوب دخان
بيدور الكدر ف كل مكان
واضاه بتبهت بالتدريج..





علي وش هزيل جاله الفيروس
وعيال حواليه قاعده تهيص..
مش فاهمه في إيه!!
ويزووم الكدر ف نن عينيه
علي دمع بيتشعبط ف الرمش
بتحاول تهرب نحيثهم..
وتعيش لو لحظه ف حزن وداع..
-طمني يا دكتور .. عامل ايه؟
-أسف يا مدام .. الفيروس شاع
و ف لحظه الكون ييضيق جدًا
يتحول كما خرم الإبره
وبسرعه يدور كدر الكاميرا
علي آخر شهقه ف أنفاسه
بتعبي ملامح آخر ضي



والدنيا غروب

وعيال تاهين من غيرعكاز

ف حواري قزاز..

والناس كالطوب

مكتوب...

مكتوب ع الشاب الي تجاوز من عشرين يوم سن الثلاثين

مكتوب ع الزين

يبعد عن كتفك يا حبيبه

ويروح ما يجيش


ولأول مره بتتفارقوا..

ولأول مره هتجري لحضنه .. تلاقى مفيش

صوته مفيش

ريحته مفيش

وهزاره معاكي لو اتخانق علي كوبايه عاوزها من النيش





مكتوب ع الحلوه يا عيني تعيش

ببواقي العمر بتتحسر..

أحلام وسنين حلوه اتعاشت..

في ثواني لاقيتها بتتكسر

مشهد متعاد

والليله ميعاد


نفس البوابه اللي بتحضن أحباب داخلين

بتعيط لاجل تودعهم..

وتجهز روحها عشان تاخذ..

أحباب تانين

* * *






* * *

يا فايت روعي ومفارق
أنا والله ما فارق..
معايا غير يدوب حاجتين
هقابل تاني زيك فين!
ومين بعدك وف بعادك
هيفهمني بنظرة عين!
وبترجاك .. عشان خاطري
يا آخر من سكن وتري
إذا هتطول الغيبه..
أمانه تطل علي قبري

* * *






* * *

لا انا هكتب واقول مشتاق
ولا هكدب واقول ناسي
أنا محتاج طبيب أشواق
يشيل ورمك دا من راسي

* * *






* * *

سبحانه من سوي
وخلقها كيف يشاء
أجمل بنات حوا
جنه وحرروفها .. ألاء

* * *






* * *

بتحايل ع الدمع يكلبش
في الرمش ويفضل متجمّع
وبقاوم بس عشان خايف
أتهان لو جرحي في يوم سمّع

* * *






* * *

إلى كل اللي غاب عني
وساب إيدي ف وقت الجد

أنا ما بقتش آمن حد

* * *





واغميرم الكحل لو قلبه



بطرف السن باس جفناك



بالمختصر

الدنيا دي فرع ف شجر

يخضرّ لو حنت إليك

يصفرّ لو مالت عليك

إرويهّا خير .. تطرح ربيع

عشمك في ربك .. لن يضيع

إسجد بقلبك للسميع

كل الذنوب راح تغتفر


بالمختصر..

عمر السهر .. ما ف مره رجّع حزن غاب

كل اللي ساب

روحك ف وقت ما عوزتهم

كان بعدهم





مكتوب علي جبينك قدر

بالمختصر..

عُض البصر

عن كل تجعيذة وجع

طالت ملامح وحدتك

خليك جدع..

وادفن بُكاك في مخدتك

واياك تفضفض للبشر

بالمختصر..

قرب المسافه كثير خطر


خليك بعيد..

دايما وحيد..

ماتدوسش ع الزووم في الصور

علشان ملامح غشهم

هتبان أكيد علي وشهم..





وتحوّل الأرواح حجر

بالمختصر

مانتاش نبي

ولا من سلالة أوليا

لو مش وفيّ

فبلاش تلوم علي سكتك

لو لم تقابل أوفيا

داين تدان .. قالوا زمان

دنيانا دايره كالحجر

بالمختصر..


عمرڪ کمان .. وانت الوتر

تبكي .. ف يعزفلك صبا

تضحك .. يطول عُمر الصبا

بطل غبا..

الحزن شايب .. لو صبي





والفرح شاب مهماً كبر

بالمختصر..

بلاش تلوم صوت المطر

علي إنه جاي يكدرك

أو ريحته جايه تفكرك

وتصحي ف عنيك الصور

العيب ماهواش ف المطر


العيب ف ناس متشتته

في ورود بترقص ف الشتا

وغصون ضعيفه بتتكسر!

دا المختصر ..

* * *





الفهرس

٦..... فضفضة

٩..... إليها

١٠..... ملاك

١٣..... مالناش نصيب

٢٥..... سنا

٣٠..... أنا حرة

٣٦..... ما حبتنيش


٤٣..... وهم

٥٠..... آسف

٥٤..... صباح

٦١..... هبتهم

٦٥..... ما نلزمنيش





۷۳ سهر

۸۱ حلم

۸۸ نجيدة

۹۳ بجها

۹۷ عاوز نساها؟

۱۰۳ با عبي

۱۰۵ ذكرى


۱۰۸ نفسى اكرهك

۱۱۲ وليكن

۱۱۷ مشهد متعاد

۱۲۷ باملخصر

* * *



جميع حقوق الطبع والنشر محفوظة ©
دار لوغاريتم للنشر والتوزيع والترجمة
المدير العام/ إيناس ناصر
المنصورة - حي الجامعة - امام القرية الأولمبية



Facebook Page: دار لوغاريتم للنشر والتوزيع والترجمة

E_mail: Logarithmpublish@gmail.com

Tel.: 01015642559



Facebook Page: @aymankotb4

Twitter: <http://www.twitter.com/aymankotb4>

